

Script of Morning Gojri News Bulletin 25 September 2024 at 1015Hrs

ما رنینگ گو جری نیو ز بلیٹن مو رخہ 25 ستمبر 2024

\*\*\*\*\*

یوہ آکا شوانی جموں بے محبوب سلطانی تیں خبر سُنو۔

Polls Phase II

جموں کشمیر اسمبلی انتخابات گا دوجا مرحلہ تحت آج 26 اسمبلی حلقہ مانہہ ووٹینگ جا ری بے۔ اس ضمن مانہہ پولینگ سٹیشناں غے باہر اپنا حق رائے دیہی غا استعمال کرن واسطے لمبی قطار دیکھی جا رہی ہیں۔ دوجا مرحلہ غے تحت جموں خطہ گا ریا سی، راجو ری تے پونچھ جد کہ کشمیر خطہ غا سرینگر، بڈگام تے گا ندر بل مانہہ ووٹینگ کرائی جا رہی بے۔ ووٹ کہلن غو یوہ سلسلو تمام 3 ہزار 5 سو 2 پولینگ سٹیشناں ور سویرے 7 بجے تون شروع بے۔ اس ضمن مانہہ بھارتی چناؤ کمیشن غی طرفوں شفافیت نانہہ یقینی بناتاں واں ویب کا سٹینگ غی سہولت وی فراہم کی گئی بے۔ اُنگاں متعلقہ ضلع انتظامیہ غی طرفوں پُر امن پولینگ منعقد کروان واسطے بڑا پیمانہ ور بندوبست کیا گیا ہیں۔ اس مرحلہ غے تحت 25 لکھ 78 ہزار ووٹر 239 امید واراں غی سیاسی قسمت غو فیصلو کریں گا۔ 15 ہزار 5 سو تون متا بے کہر کشمیری پنڈت اس مرحلہ غے تحت پورا مُلک مانہہ 24 پولینگ سٹیشناں تون اپنا حق رائے دیہی غو استعمال کرن واسطے اہل ہیں۔ قابل ذکر بے جے یوٹی جموں کشمیر مانہہ 3 مرحلاں غے تحت ووٹینگ منعقد کرائی جا رہی بے۔ پہلا مرحلہ غے تحت 18 ستمبر نانہہ ووٹ کہلیا گیا تھا جد کہ دوجا مرحلہ غے تحت 25 ستمبر یعنی آج غے تہاڑے تے تیجا مرحلہ واسطے پہلی اکتوبر نانہہ ووٹ کہلیا جا ئیں گا۔ پہلا مرحلہ غے تحت ریکارڈ تعداد مانہہ 61 فیصد تون متی پولینگ درج کی گئی بے۔

\*\*\*\*\*

Key Leaders

جموں کشمیر اسمبلی انتخابات گا دوجا مرحلہ واسطے اک ووٹینگ شروع ہو گئی بے۔ اس مرحلہ غے تحت 25 لکھ تون متا ووٹر 239 امید واراں گی سیاسی قسمت غو فیصلو کریں گا۔ دوجا مرحلہ غے تحت 26 اسمبلی حلقاں غے اندر انتخابی عمل

مانہہ حصو لین آلاں مانہہ سابق ریا سستی وزیر اعلیٰ عمر عبداللہ جھیڑا کہ گاندر بل تون انتخابی میدان مانہہ بیں۔ کا نگریس غا صدر طا رق حمید قراہ جھیڑا جے سینٹرل شالتینگ تون چناؤ لڑ ریا بیں۔ جموں کشمیر بی جے پی پی غا صدر رویندر رینہ نو شہراہ تون میدان مانہہ بیں۔ انہاں تون علا وہ جیل مانہہ بند مذہبی رہنما سرجن احمد وگے عرف برکا تی، انجینئر رشید غی طرح تاریخ دُبران غی اُمید مانہہ حلقہ انتخاب بیرواہ تے گا ندر بل تون چناؤ لڑ ریا بیں۔ اُنگاں شری ماتا ویشنو دیوی تون سابق وزیر جُگل کشور شرما آزاد اُمید وار غی حثیت تون میدان مانہہ بیں۔ انہاں تون علا وہ بدھل اسمبلی حلقہ تون چودھری ذولفقار علی، تھنہ منڈی تون پی ڈی پی غا قمر حسین، شری ماتا ویشنو دیوی تون بی جے پی غا راج شرما، نو شہراہ تون این سی سی گا سریندر چودھری اعجاز خان گلاب گڑھ تون آزاد اُمید وار غی حثیت جدکہ ریاسی تون ممتاز خان کا نگریس گا اُمید وار غے طور ور میدان مانہہ بیں۔ انہاں تیں علا وہ کئی دوجا رہنما وی سیا سی قسمت غو اج فیصلو وے گو۔

\*\*\*\*\*

#### JK Polls PM

جموں کشمیر غا 26 اسمبلی حلقہ مانہہ دوجا مرحلہ غے تحت اج ووٹینگ جاری ہے۔ اس ضمن مانہہ وزیر اعظم نریندر مو دی نے لوکاں تون اپیل کی ہے جے جمہو ریت نانہہ مضبوط کرن واسطے اپنا حق رائے دیہی غو استعمال بدھ چڑھ غے کریں۔ اک سماجی میڈیا پوسٹ مانہہ جناب مو دی نے پہلی بار اپنا حق رائے دیہی غو استعمال کرن آلا نوجوان ووٹراں نانہہ مبارک باد دتی ہے۔ اُنگاں وزیر داخلہ امت شاہ نے سماجی میڈیا غی سائٹ ایکس ور اک پوسٹ مانہہ دوجا مرحلہ غے تحت آن آلا ووٹراں تون اپیل کی ہے جے ویں متی تون متی تعداد مانہہ پولینگ سٹیشناں ور جا گے اپنا ووٹ غو استعمال کریں تانجے جموں کشمیر نانہہ دہشت گردی تون پاک تے ترقی یافتہ بنايو جا سکے۔ انہاں نے کہیو جے ریکارڈ تعداد مانہہ اُس سرکار واسطے ووٹ کرو جھیڑی نوجواناں غا بہترین مستقبل تے ترقی واسطے کم کر سکے

\*\*\*\*\*

## Rajouri

ضلع چناؤ اتھارٹی راجو ری نے ووٹراں توں اپیل کی ہے جے ویں پولینگ سٹیشناں ور اپنا حق رائے دیہی غا استعمال کرن غے دوران اہل شناختی کا رڈ نانہ وی لوک رکھیں۔ اس ضمن مانہ ہر اہل ووٹر نانہ جمہوری نظام مانہ شرکت غی دعوت دیتاں واں ضلع چناؤ اتھارٹی نے کہیو جے شناختی کا رڈ، ڈرائیونگ لائسنس، پین کارڈ، ایم جی نریگا کارڈ تے دیگر غی صورت مانہ ہونو چاہیے۔

\*\*\*\*\*

## Campaign Phase 3rd

سیاسی جماعتاں غی طرفوں تیجا تے آخری مرحلہ واسطے انتخابی مہم نانہ مزید تیز کر دتو گیو ہے۔ اس ضمن مانہ بکھ بکھ رہنماں غی طرفوں عوام نانہ اپنی طرف راغب کرن واسطے انتخابی ریلی روڈ شو تے دیگر غو انعقاد کیو جا رہیو ہے۔ اس سلسلہ مانہ حزب اختلاف غا رہنما راہل گاندھی جموں کشمیر غو دورو کریں گا۔ اک پارٹی رہنما نے دسیو ہے جے جناب گاندھی جموں مانہ جے کے ریزارٹ گامیدان مانہ عوامی ریلی سنگ خطاب کریں گا اس توں بعد فر ویں کشمیر غو دورو کریں گا جت وے سوپور با رہمولہ مانہ عوامی ریلی سنگ خطاب کریں گا۔ قابل ذکر ہے جے یوہ جناب راہل گاندھی غو تیجو دورو وے گو۔ اس تیں پہلاں انہاں نے سرنکوٹ، سرینگر، بانہال تے انتت ناگ مانہ پارٹی اُمید واراں غا حق مانہ ریلیاں سنگ خطاب کیو ہے۔ اُنکا مرکزی وزیر داخلہ امت شاہ تے اُتر پردیش کا وزیر اعلیٰ یوگی آدیتیا ناتھ 26 ستمبر نانہ بالترتیب 4/4 ریلیاں سنگ خطاب کریں گا۔ اس تیں علاوہ وزیر دفاع راجناتھ سنگھ، شاہراں تے سڑک ٹرانسپورٹ غا وزیر نتن گڈکری، سابقہ مرکزی وزیر تے بی جے پی حکومت آلی ریاستاں غا وزیر اعلیٰ وی 26 توں 29 ستمبر تک تیجا تے آخری مرحلہ واسطے انتخابی مہم چلا ویں گا۔ وزیر اعظم نریندر مو دی 28 ستمبر نانہ مولانہ آزاد سٹیڈیم مانہ بی جے پی اُمید واراں واسطے اک وسیعی عوامی ریلی سنگ خطاب کریں گا۔ اس طرح جناب مو دی غی یا ہ چوتھی انتخابی ریلی وے گی۔ اس تیں پہلاں انہاں نے ڈوڈہ، کٹڑا تے سرینگر مانہ عوامی ریلیاں سنگ خطاب کیو تھو۔ واضع رہے جے پہلی اکتوبر نانہ جموں کشمیر اسمبلی انتخابات غا تیجا تے آخری

مرحلہ واسطے ووٹینگ کرائی جا ئیگی۔ اس مرحلہ غے تحت 40 اسمبلی حلقہ اندر ووٹینگ بونی ہے۔

\*\*\*\*\*

اس غے نال بی خبراں غو یوہ بلیٹن ختم ہوؤ۔